

**AWIG – AWIG
DESA PEKRAMAN SAYAN**

**DESA SAYAN KECAMATAN UBUD
KABUPATEN GIANYAR**

2021

PIDAGING

MAKA BANTANG AWIG-AWIG DESA PEKRAMAN SAYAN

MURDDHA CITTHA	1
PRATHAMAS SARGAH : ARAN LAN WEWIDANGAN	2
DWITYAS SARGAH : PAMIKUKUH LAN PATITIS	4
TRITYAS SARGAH : SUKERTA TATA PAKRAMAN	5
Palet 1 Indik Krama	5
Palet 2 Indik Prajuru Adat	8
Palet 3 Indik Paruman	10
Palet 4 Indik Kulkul	11
Palet 5 Indik Druwen Desa	12
Palet 6 Indik Bhaya	14
Palet 7 Indik Panyanggran Banjar	15
CATHURTAS SARGAH : SUKERTA TATA AGAMA	16
Palet 1 Indik Dewa Yadnya	16
Palet 2 Indik Resi Yadnya	25
Palet 3 Indik Pitra Yadnya	27
Palet 4 Indik Manusa Yadnya	32
Palet 5 Indik Bhuta Yadnya	33
Palet 6 Indik Penyepian	34
PANCHAMAS SARGAH : SUKERTA TATA PAWONGAN	37
Palet 1 Indik Pawiwahan	37
Palet 2 Indik Nyapihan	39
Palet 3 Indik Sentana	41
Palet 4 Indik Warisan	43
SATSAT SARGAH : SUKERTA TATA PALEMAHAN	47
Palet 1 Indik Karang, Carik lan Tegal	47
Palet 2 Indik Pepayonan	48
Palet 3 Indik Wewangunan	49
Palet 4 Indik Wewalungan	50
SAPTAMAS SARGAH : WICARA LAN PAMIDANDA	53
Palet 1 Indik Wicara	53
Palet 2 Indik Pamidanda	53
ASTAMAS SARGAH : NGUWAH NGUWUHIN AWIG-AWIG	55
NAVAMAS SARGAH : SAMAPTA	56

MURDDHA CITTA

**OM, AWIGHNAMASTU NAMA SIDHYAM, PATUSING PASEBAN DÉSA PAKRAMAN SAYAN
GUMAWE AWIG-AWIG DÉSA PAKRAMAN MAKA SEPAT SIKU-SIKU PAMATUT, WASTU
KASIDAN PRAYOJANA MAMI KABEH, PRESAMA ANGIDEP MUAH AMANGGEH AKEN KADI
LINGING AWIG-AWIG IKI.**

BENDÉSA PAKRAMAN SAYAN

PRATHAMAS SARGAH
ARAN LAN WAWIDANGAN DÉSA

Pawos 1

- (1) Désa pakraman puniki mawasta Désa pakraman Sayan.
- (2) Jebar kakuwub wawidangannia mawates nyatur ; ha. Sisih wetan Désa pakraman Penéstanan ; na. Sisih kidul Désa pakraman Singekerta lan Tebongkang ; ca. Sisih kulon tukad Ayung ; ra. Sisih lor Désa pakraman Kedéwatan.
- (3) Désa pakraman puniki kawangun antuk munjuk lungsuring saking karang ayahan Désa.
- (4) Mungwing wawidangan palemahannyané kepah dados néné m Banjar luihé :
 - ha. Banjar Kutuh kawangun antuk 97 karang ayahan désa. na. Banjar Pandé kawangun antuk 42 karang ayahan désa. ca. Banjar Baung kawangun antuk 61 karang ayahan désa. ra. Banjar Mas kawangun antuk 41 karang ayahan désa. ka. Banjar Sindu kawangun antuk 72 karang ayahan désa.
 - da. Banjar Ambengan kawangun antuk 35 karang ayahan désa.

Pawos 2

- (1) Manut Tri Linganing Désa, kuwub wawidangan pinara tiga luwirié :
 - ha. Utama Mandala minakadi tegak kayangan désa ;
 - na. Madya Mandala minakadi papupulan karang paumahan lan telajakan désa ; ca. Nista Mandala minakadi sétran désa.
- (2) Wates palemahan Banjaré patut :
 - ha. Kamanggéhan antuk paruman désa; na. Manut pararem Banjaré wenang kepah dados témpékan-témpékan.

Pawos 3

- (1) Banjaré wenang ngardi awig-awig muah pararem maka pamikukuhnyané.

- (2) Awig-awig Banjar tan wenang lémpas ring awig-awig muah pararem Désa, **saketaer** kalingga tanganin antuk Bandésa maka pamikukuhnyané dumogi sida kalumaksana.
- (3) Sahanan Témpekan tan wenang ngardi awig-awig, santukan témpekan kémawon mawak pahan sinanggeh tangan **sikuning (sakuning)** Banjar.
- (4) Awig-awig muah pararem– pararem Subak ring telajakan Désa, tan marén taler kaingilang.

DWITYAS SARGAH
PAMIKUKUH LAN PATITIS

Pawos 4

Désa pakraman Sayan ngamanggéhan pamikukuh/ dasar :

- (1) Pancasila, **sakadi munggah ring Pembukaan UUD 1945.**
- (2) Undang-Undang Dasar 1945.
- (3) Tri Hita Karana, manut tatuaning Bhuana Agung.

Pawos 5

Patitis – patitis Désa pakraman luihé :

- (1) Mikukuhin miwah ngarajegang Sang Hyang Agama.
- (2) Nginggilang tata prawertiné magama.
- (3) Ngarajegang kasukertan Désa saha pawongania sami sakala kalawan niskala.

TRITYAS SARGAH
SUKERTA TATA PAKRAMAN

Palet 1

Indik Krama

Pawos 6

- (1) Sané kabaos Krama Désa inggih punika kulawarga sané magama Hindu, ngemong Karang Ayahan Désa utawi krama sané magenah netep wiadin madunungan sajeroning palemahan Désa pakraman Sayan.
- (2) Sajaba punika sinanggeh tamiu.

Pawos 7

Bacakan Krama Désa utawi Banjar, luiré :

- (1) Krama Ngarep, inggih punika kulawarga sané ngemong karang ayahan Désa.
- (2) Krama Pangelé, inggih punika kulawarga sané tan pakarang, turmaning kaundulang antuk krama ngarep.
- (3) Krama Balu, krama sakadi manut ring angka 1 lan 2 pawos 7 puniki, sinalih tunggil lanang utawi istri kelayuan (padem).
- (4) **Krama Dehe Teruna (Teruna-Teruni) inggih punika krama sané sampun mayusa 15 (limolas) warsa sané istri, 18 (plekutus) warsa sané lanang.**

Pawos 8

Kawit dados Krama Désa utawi banjar, luiré :

- (1) Mawiwit sangkaning ngemong karang ayahan désa.
- (2) Malarapan antuk pawiwahan risampun mawidhiwidana manut dresta lan agama.
- (3) Sangkaning sampun mayusa 15 (limolas) warsa sané istri muah 18 (plekutus) warsa sané lanang kawastanin Dehe Teruna utawi teruna-teruni.

ha. Dehe Teruna utawi Teruna-Teruni puniki kapupulang ring sekaha “Dehe Teruna” suang-suang Banjar, tur kaiket malih dados sekaha “Dehe Teruna Désa pakraman”.

na. Parindikan Dehe Teruna sampun kaiket taler antuk awig-awig Dehe Teruna Désa pakraman muah Awig-awig utawi pararem Dehe Teruna suang-suang Banjar.

- (4) Mawiwit sakéng jumeneng mapaumahan wiadin ngereh pangupa jiwa sajeroning palemahan Désa pakraman tur risampun polih pawanengan 3 (tigang) sasih, sajawaning sané ngamargiang karyan sang mawangraet utawi “Guru Wisésa”.
- (5) Yanin siwosan ring punika kasinanggeh tamiu.

Pawos 9

- (1) Satunggil karang désa ngamedalang ayah Désa utawi Banjar sanunggal.
- (2) Ayah – ayahan sané siwosan ring soang-soang Banjar sakadi kasurat ring awig-awig utawi pararem– pararem Banjar soang-soang.

Pawos 10

Tetegenan krama désa utawi banjar sakadi ring sor :

- (1) Krama ngarep karang désa keni ayahan muah pepeson mamungkul.
- (2) Krama balu sané ngarep keni ayahan muah pepeson manut kawongania.
- (3) Wong ubuh durung menggah Dehe Teruna saha tan madruwé pangundul mungging ayah lan pepeson padagingan kéwanten, luput ayahan lan rerampé, sakémawon duman polih.

Pawos 11

- (1) Swadharmaning krama désa utawi banjar, patut ; ha. Drade atuan ring désa utawi banjar.
na. Tinut satuwut ring sadaging awig-awig, pasuara lan pararem désa utwi banjar.
ca. Tan marén ngutsahayang mangda désané nyidayang nyunyur anut patitis kadi mungгах ring pawos 5 ring ajeng.
- (2) Swadharmaning tamiu, patut :
ha. Tinut satuwut ring tatiwak désané ngutpati sukertan sekala niskala. na.
Nénten tungkas ring kertin désané utawi banjaré.

Pawos 12

- (1) Sahanan krama Désa utawi Banjar polih pasayuban prajuru ngamanggéhang luih patitis tur kabaosin saha katiwakin pamatut sahanan wicarannyané.
- (2) Nyarengin paruman Désa utawi Banjar saha wenang mastikayang pamutus.
- (3) Kengin mapuangkid, nyada, nyuksukin, luput, mogpog muah ngoot manut paetangan:
 - ha. Mapuangkid, ngeluputin ayah-ayahan Désa utawi Banjar manawita sungkan, mayadnya, matepetin sungkan miwah sané siosan manut pararem Banjar soangsoang.
 - na. Nyada ngamademang ayahan/pepeson riantukan sampun wénten penyada utawi lanjut yusa, wiadin pinunas praragan riantukan sungkan-sungkanan.
 - ca. Nyuksukin ayahan, ngantinin pangayah antuk anak tios. Sané kadadosang nyuksukin, yanin sampun ngayah Dehe Teruna utawi, sampun marabian.
 - ra. Mogpog, ngetut ayahan utawi pepeson antuk arta brana (jinah). Ageng alitnyané manut pararem Banjar soang-soang. ka. Ngoot, ngentos ayahan saha pepeson antuk harta brana, utawi jinah. Ageng alit manut pararem soang-soang Banjar.

Pawos 13

- (1) Wusan dados Krama Désa utawi Banjar kadi ring sor :
 - ha. Sangkanin magingsir genah sakéng wawidangan Désa, maduluran antuk nunas panugrahan pangilik kitan prajuru. na. Kenoroyang antuk Banjar utawi Désané.
 - ca. Sampun tan magama Hindu malih.
- (2) Sané wusan makrama Désa utawi Banjar, tan polih pah-pahan sahananing druwén désa utawi Banjar.

Palet 2
Indik Prajuru Désa

Pawos 14

- (1) Désa Pakraman Sayan kénterang antuk Bandésa.
- (2) Banjar kénterang antuk kelihan Banjar.
- (3) Témpekan-témpekan ring Banjar kénterang antuk kelihan témpekan.
- (4) Bandésa, Kelihan Banjar muah Kelihan Témpekan, keadegang malarapan antuk kagilih ring parumannyané soang-soang.
- (5) Sakaluring prajuru sané kabaos ring ajeng kamadegang suwénané 5 (limang) warsa, sakéwanten dados kagilih malih.

Pawos 15

- (1) Bandésa **muah Kelihan Banjar** kasanggra olih :
 - ha. Patajuh minakadi pengabihnya.
 - na. Panyarikan minakadi juru nyurat.
 - ca. Petengen minakadi juru rumaksa druwén Désa utawi Banjar.
 - ra. Kasinoman minakadi juru arah.
 - ka. Sajaba punika Bandésa kasanggra malih olih :
 - 1) Pamangku-pamangku kahyangan tiga.
 - 2) Kelihan-kelihan Banjar.
 - 3) Para duta Banjar soang-soang kuwub satus 4 (petang) diri.
 - 4) Samian prajuru Dehe Teruna Désa muah adiri prajuru Dehe teruna soangsoang Banjar.
 - 5) **Pecalang Desa Pakraman.**
- (2) Sané dados kagilih kadadosang prajuru Désa utawi Banjar muah panyanggranyané :
 - ha. Sampun mayusa paling akidik 25 (selaé) tiban.
 - na. Sampun maparabian.
 - ca. Uning nyurat aksara Latin utawi Bali, ngwacén, sadu, mawibawa, tur masolah becik.

ra. **Tan naaning katiwakin pamidanda (hukuman) utawi kasisipang ring anaké agung (Pemerintah).**

ka. Sumanggup dados prajuru tur susatya jaga ngalaksanayang swadharmaning sang prajuru.

da. **Mawit saking krama marep.**

(3) Prajuru inucap ring ajeng kagilih olih krama, sané malarapan antuk Paruman Agung Désa utawi Banjar.

Pawos 16

(1) Swadharmaning Bandésa utawi Kelihan Banjar luihé :

ha. Ngénterang paruman-paruman Désa utawi Banjar.

na. Ngénterang tur ngalaksanayang sadaging awig-awig, dresta, pamutus wiadin pararem-pararem Désa utawi Banjar.

ca. Ngénterang tata titi nganggé seraja brana druwén Désa utawi Banjar.

ra. Nuntun tur ngénterang warga Désa ngutpadi kasukertan sakala niskala.

ka. Nuntun saha ngénterang warga Désa ngulati nginggilang Darma Agama muah Darma Negara, Kasucian Kahayangan, Kasucian Pawongan muah tata caraning nganggé sétra.

da. Mawosin kalih miwakin pamatut marep ring wicaran warga Désané.

ta. Nuntun saha nyaksinin tata cara miwah pengaskaraning sahanan kahuripan sané mabuat minakadi sané ngilitang sulur pakula wargan.

sa. Maka duta Désa utawi Banjar matemuang baos ring sapa sira ugi.

wa. Miwah sané siosan manut dresta.

(2) Tata caraning ngalaksanayang swadharmaning ring ajeng tan maren manut ring awig-awig, dresta miwah pararem-pararemutawi pamutus-pamutus Désa utawi

Banjar.

(3) Pengalaksanaan ring ajeng patut kesiarang ring paruman Désa utawi Banjar.

(4) Bandésa utawi Kelihan Banjar suma kuta natak pamutus paruman Désa utawi Banjar nganihin ngalaksanayang swadharmannya soang-soang.

- (5) Swadharmaning prajuru sané siosan ring Bandésa muah Kelihan Banjar, wantah nyanggra nyerayanin Bandésa utawi Kelihan Banjar manut dudonan.

Pawos 17

Petias (ulih-ulihan) Prajuru Désa utawi Banjar luihé :

- (1) Leluputsn wewedalan rerampé.
- (2) Cenéngan duman malang aduman.
- (3) Muah sané siosan manut pararem.

Pawos 18

(1) Prajuru patut kagentosin riantukan :

- ha. Kelayuan utawi séda.
- na. Sampun manut ring sengkernia.
- ca. Sangkanin pinunasnyané menawita wénten wicara sané mabuat.
- ra. Kenoroyang antuk krama désané utawi banjar duaning ngawé tuang biota lan sané sioasan sané tan manut sakadi swadharmaning prajuru.

(2) Ngentosin utawi ngenoroyang prajuru mangda sajeroning paruman agung tur kararemin antuk krama Désa utawi Banjar.

(3) Prajuru sané kenoroyang tangkengin kewaliang malih dados prajuru.

Palet 3

Indik Paruman

Pawos 19

(1) Paruman-paruman ring Désa utawi Banjar luihé :

- ha. Paruman Désa kawéntenan nyabran awarsa apisan.
- na. Paruman Banjar, wantah manut dresta utawi Pararem Banjar soang-soang.
- ca. Paruman prajuru kawéntenang sarahina sadurung paruman Désa utawi Banjar.

- ra. Paruman sekaha Dehe Teruna, wantah manut awig-awig Dehe Teruna.
 - ka. Paruman Panyanggra Bandésa kawéntenan nyabran Umanis Tumpek.
- (2) Sahanan paruman sida lumaksana yanin sampun katedunin antuk sang patut nyarengin, bilih lingkungan atenge akéhnyané.
 - (3) Ring Sahanan Paruman tan marén kariinin (kamanggalain) antuk pangrencana ring Ida Bhagawan Penyarikan Saha Widhi widana (Cané).
 - (4) Warga Désa utawi Banjar sané nyarengin parum, patut nganggé busana adat sanistannyané wastra lan kampuh.

Pawos 20

- (1) Sajaba kadi sané menggah ring ajeng Paruman Désa utawi Banjar taler dados kawéntenang pradé kawidi antuk krama désané, langkungan ring atenge akéhnyané.
- (2) Sang ngawidi patut mastikayang, bantang sané mabuat sandang kabaos ring paruman inucap.
- (3) Ring paruman sakadi puniki taler patut katiwakin pamutus.

Palet 4

Indik Kulkul

Pawos 21

- (1) Kulkul ring sajebag Désa wénten petang soroh luiré :
 - ha. Kulkul Désa magenah ring Pura Désa.
 - na. Kulkul Banjar magenah ring soang-soang Banjar.
 - ca. Kulkul Dehe Teruna magenah ring soang-soang Banjar.
 - ra. Kulkul sekaha-sekaha, magenah ring prajurunya soang-soang.
- (2) Kulkul Désa utawi Banjar miwah Sekaha, tan wenang katepak yaning tan sangkanin pituduh prajuru.
- (3) Tabuh tatepakan Kulkul, pastika matiosan manut tetujon, lan manut dresta muah pararem soang-soang Banjar.

Pawos 22

- (1) Sang nepak kulkul tan sangkaning pituduh prajuru, patut digelis atur **supéksa** maka buat panepaké yan tan mangkana kadanda manut pararem, asapunika taler yan nepaké tan manut wiguna.
- (2) Pamidanda kadi ring ajeng manut pararem soang-soang Banjar.

Pawos 23

- (1) Tangerang kapancabaya wenang katedunin, antuk sahanan ayahan saha gagawan manut rupan bayané.
- (2) Tangerang kapancabaya 3 (tigang) tulud bulus, patut kasawurin antuk Banjar siosan.
- (3) Suaran kulkul sekaha tan wenang matuhin tur nyawurin tengeran kulkul Banjar.

Palet 5

Indik Druwén Désa

Pawos 24

Paduwén Désa Pakraman kadi ring sor :

- (1) Kayangan Tiga utawi Kayangan Désa jangkep sakaluir busanania.
- (2) Tanah laba pura Kayangan Tiga.
- (3) Sétra 3 palebon soang-soang kepah sétra raré muah Sétra Agung.
- (4) Piranti-piranti Désa utawi Banjar luiuré :
 - ha. Wawangunan-wawangunan ring Kayangan Tiga.
 - na. Balai banjar ring soang-soang Banjar minakadi piranti Banjar. ca. Gong abarung Piranti Désa.
 - ra. Miwah sané siosan.

Pawos 25

- (1) Pamupon (upon-upon) tanah palaba pura ring ajeng keanggén saprebia mecikang pawangunan ring Pura Kayangan Tiga (Kayangan Désa) sakirangnia krama désa patut nguronin manut pararem.
- (2) Druwén Désa minakadi kecapé ring ajeng tan kéngin kaadol utawi kagadéang sejawaning sampun kararemin antuk krama Désa manut patitis Désa.

Pawos 26

- (1) Palaba Pura Dalem kepah dados 4 (papat) minakadi :
 - ha. Apahan kakaryanin antuk Pamangku, upon-uponia kaanggé prabéa prerainan ring Pura Dalem.
 - na. Apahan kakaryanin tur keuponin antuk kuwub satus Banjar Kutuh lan Banjar Pandé.
 - ca. Apahan kakaryanin tur keuponin antuk kuwub satus Banjar Baung lan Banjar Mas.
 - ra. Apahan kakaryanin tur keuponin antuk kuwub satus Banjar Sindu lan Banjar Ambengan.
- (2) Pangentos laba Pura Dalem sané kaanggé genah sekolahan upon-uponia kakuasa olih Désa.
- (3) Laba Pura Puseh, upon-uponia kepah dados 3 (tiga) minakadi :
 - ha. Apahan kadruéyang antuk penandu.
 - na. Apahan antuk pamangku kaanggé prabéa prerainan ring Pura Puseh.
 - ca. Apahan kakuasa antuk Désa.
- (4) Palaba Pura Désa taler kepah dados 3 (tiga) minakadi :
 - ha. Apahan kadruénang antuk penandu.
 - na. Apahan oleh pamangku kaanggé prabéa prerainan ring Pura Désa. ca. Apahan dados bukti Bandésa.

Pawos 27

Nyabran paruman Désa utawi Banjar patut nyiarang sahanan parindikan munjuk lungsuring druwén Désa utawi Banjar antuk ilikita pastika.

Palet 6

Indik Bhaya

Pawos 28

(1) Sané sinanggeh baya utawi dusta bacakannyané luihé :

- ha. Jiwa baya
- na. Artha baya
- ca. Gni baya
- ra. Er baya
- ka. Palegandangan
- da. Durecara ring agama

(2) Sahanan warga désa sané uning ring kawéntenané jatma sané ngalaksanayang dusta utawi baya, wiadin penangkan baya, wiadin jatma sané jaga ngalaksanayang dusta utawi baya, patut pinih gelis (premangkin) atur uningé ring sang prajuru.

(3) Bilih mabuat kawéntenané sang uning patut digelis nyuarayang kulkul manut panglaksanaan baya utawi dustané.

(4) Pradé wénten suaran kulkul sakadi kecapé ring ajeng, warga désané patut medal mitulungin sang keni baya antuk gegawan manut baya.

Pawos 29

(1) Pradé penangkan baya utawi dustané punika mawetu sakéng kaiwangan wong désa utawi banjar inucap, wong punika olih prajuru Désa utawi Banjar patut katiwakin pamidanda ngewaliang sahanan sané kadusta utawi kabaya saha katiwakin pamidanda manut pararemBanjar soang-soang.

(2) Sajaba punika sang ngawébaya patut katur ring sang angawé rat (Pemerintah).

(3) Maweweh pengaskara sapatutipun, yanin sané kabaya punika sinanggeh barang suci.

Palet 7

Indik Panyanggan Banjar

Pawos 30

- (1) Rikala ngawangun yadnya suka utawi duka, kengin nunas panyanggan Banjar malarapan atur supéksa ring prajuru Banjar manut ageng alit pakaryan.
- (2) Panyanggan Banjar wantah manut dresta, Pararem, utawi pamutus Banjar soangsoang.

CATURTAS SARGAH
SUKERTA TATA AGAMA

Palet 1

Indik Dewa Yadnya

Pawos 31

(1) Palinggih penyiwian sané wénten sawawidangan Désa Pakraman Sayan luiré :

- ha. Pura Désa lan Balé Agung.
- na. Pura Puseh.
- ca. Pura Dalem, Taman Arum lan Prajapati.
- ra. Pura Baturning
- ka. Pura Tegal Suci
- da. Pura Manca ring soang-soang Banjar.
- ta. Pura Melanting.
- sa. Pura Paibon, Pemaksan, Dadia.
- wa. Pamerajan ring soang-soang krama.

(2) Rahina piodalan utawi patirtan ring soang-soang khayangan désa minakadi :

- ha. Pura Désa lan Balé Agung ring rahina Anggara Kliwon Kulantir.
- na. Pura Puseh ring rahina Anggara Kliwon Kulantir.
- ca. Pura Dalem, Taman Arum muah Mrajapati ring rahina Anggara Kliwon Prangbokat.

(3) Panemayan patirtan ring khayangan tiga (désa) kadi ring sor :

- ha. Ring Pura Désa lan Balé Agung, panemayan patirtan 6 (enam) sasih apisan; apisan patirtan alit, apisan patirtan Agung.
 - 1) Patirtan alit Ida Bhatara nyejer 2 (kalih) rahina.
 - 2) Patirtan agung Ida Bhatara nyejer 3 (tigang) rahina.
- na. Ring Pura Puseh, sinarengan muah pateh kadi ring Pura Désa.
- ca. Pura Dalem, Taman Arum muah ring Prajapati panemayan Patirtan 6 (ngenem) sasih apisan, patirtan Agung Ida Bhatara nyejer 3 (tigang) rahina.

- ra. Khayangan sané wénten ring soang-soang Banjar sakuwuban Désa Pakraman Sayan, panemayan patirtan manut ring dresta sané sampun kamargiang ring soang-soang Banjar.
- (4) Pengaci ring Khayangan Tiga manut Nista, Madya, Utama nganutin sastra agama lan drestané sané sampun mamargi.
- (5) Mitegepin pamargi kamedalang antuk krama Désa Pakraman sané polih giliran ngemong (kuwub satus) patirtan ring Pura inucap.
- ha. Ritatkala patirtan ring soang-soang khayangan Désa pingkalih khayangan Tiga patut kawéntenan ilén-ilén wewalian minakadi gabor lan rejang sané kasangggra antuk krama sané polih giliran ngodalin selami Ida Bhatara nyejer.
- na. Krama Désa Pakraman sané polih giliran maturan, mangda mapééd sané kaénterang antuk prajuru Banjar inucap kasarengin antuk prajuru désa, mategepin **pamarginnya** manut tripramana.
- ca. Ritatkala rahina patirtan ring Pura Khayangan Tiga Ida Bhatara ngunye ka Pura Patirtan inucap, lan rikala saniscara kliwon kuningan Ida Bhatara Dalem ngunye ring sakuwuban Désa Pakraman Sayan.
- ra. Yan wénten Wali Agung sakadi pasebayan (nemu Purnama, Tilem) wiadin sakaluir punika upakarania kasungkemin antuk Désa Pakraman Sayan.
- ka. Ritatkala Patirtan ring Khayangan Tiga muah Khayangan Désa siosan Pura Subak, Panti utawi/ Paibon muah Pamerajan, sang jaga ngranjing ring Pura genah patirtan, mangda nganggé busana adat manut susila luwiré makampuh lan madestar.
- da. Yanin krama sané ngranjing ka Pura rikala tan Patirtan, minek ngayah, muah mabuat sané siosan kengin wantah maselémpot sanistan ipun.
- ta. Yanin wénten wong dura Negara sané jaga ngranjing ring sajeroning Pura utawi genah suci mangda mapenganggé manut susila sanistan ipun paselémpot tur sampun kalugra antuk prajuru désa utawi Banjar.
- (6) Pangemong utawi pangemponia :
- ha. Wawangunan sané kaempon antuk Désa Pakraman minakadi :
- 1) Wantilan ring Pura Désa.
 - 2) Candi Bentar ring jaba Pura Désa, rauh témbok panyengker pangapit sadelod bale kulkul.

- 3) Bebaturan ring Pura Puseh.
- 4) Pelinggih Pan Balang Tamak.
- 5) Béji ring Pura Puseh.
- 6) Pelinggih Bhatara Sakti ring Pura Dalem.
- 7) Balé Gong ring Jeroan Kangin utawi (Balé Pangrawos).
- 8) Wantilan ring Pura Dalem.
- 9) Béjin Ida Bhatara Dalem.

na. Ulun Sétra utawi Prajapati ring sétra nampek Pura Dalem Gede kaempon antuk :

- 1) Banjar Pandé.
- 2) Banjar Mas.
- 3) Banjar Baung.
- 4) Banjar Sindu.

ca. Ulun Sétra utawi Prajapati ring Banjar Kutuh kaempon antuk Banjar Kutuh.

ra. Ulun Sétra utawi Prajapati ring Banjar Ambengan kaempon antuk Banjar Ambengan.

ka. Panggungan ring Jaba Tengah rauh kebataran Balé Agung ring Pura Désa kaempon antuk :

- 1) Banjar Kutuh.
- 2) Banjar Pandé.
- 3) Banjar Mas.
- 4) Banjar Baung.

da. Wawangunan sané kaempon antuk Banjar Mas sareng Banjar Baung minakadi :

- 1) Kori Agung rauh témbok pangapit ring Pura Puseh.
- 2) Témbok panyengker sebalér Balé Agung.
- 3) Padmasana ring Pura Puseh.
- 4) Perantenan.

ta. Wawangunan sané kaempon antuk Banjar Kutuh, Banjar Pandé, Témbok Panyengker sédauh Perantenan.

sa. Ring Pura Désa kaempon antuk Banjar Kutuh sareng Banjar Pandé (kuwub satus), rauh mareresik minakadi malaplap, maambu-ambu rikala patirtan Ida Bhatara. Tetangunan wiadin (Pelinggih) sané kaempon olih Banjar Kutuh ring Pura Désa minakadi :

- 1) Paselang.
- 2) Balé Gong ring Jeroan.
- 3) Pepelik
- 4) Panggungan ring Jeroan.
- 5) Kemimitan.
- 6) Méru.
- 7) Catu.
- 8) Sédan.
- 9) Ngurah Agung.
- 10) Kori Agung rauh témbok pangapit.
- 11) Apit lawang.
- 12) Bungan Balé Agung.
- 13) Témbok sadelod Peselang Pura Désa.
- 14) Témbok Panyengker Dajan Pura, Dangin Pura, Dauh Balé Gong ring Jeroan.

Tetangunan wiadin (Pelinggih) sané kaempon olih Banjar Pandé ring Pura Désa minakadi :

- 1) Padmasana.
- 2) Pengaruman.
- 3) Limas.
- 4) Balé Gong jaba Tengah.
- 5) Bataran Balé Kulkul.
- 6) Panyengker delod perantenan sadauh Balé Gong ring jaba tengah.
- 7) Panyengker sadauh pengaruman rauh kabucu kajakauh.

wa. Ring Pura Puseh kaempon antuk Banjar Baung sareng Banjar Mas (Kuwub satus), rauh mareresik, meambu-ambu rikala patirtan Ida Bhatara.

Tetangunan wiadin (Pelinggih) sané kaempon antuk Banjar Mas ring Pura Puseh minakadi :

- 1) Pepelik.
- 2) Pangapit ring pepelik.
- 3) Balé Penganteb.
- 4) Panggungan ring jeroan.
- 5) Sédan pangénter.
- 6) Pelinggih arca.
- 7) Témbok Panyengker dajan Pura.
- 8) Candi Bentar Jaba Tengah.

Tetangunan wiadin (Pelinggih) sané kaempon olih Banjar Baung ring Pura Puseh minakadi :

Méru rauh Pangapit.

- 1) Pengaruman.
- 2) Peselang.
- 3) Gedong Sari.
- 4) Ngerurah Agung.
- 5) Apit Lawang.
- 6) Témbok Panyengker dangin Pura ring Jeroan.
- 7) Témbok Panyengker dangin Balé Agung.
- 8) Témbok Panyengker dauh Balé Kulkul dangin Candi Bentar.
- 9) Témbok Panyengker dauh Candi Bentar delod Balé Gong ring Jaba Tengah.
- 10) Bungan Balé Kulkul.

la. Ring Pura Dalem kaempon antuk Banjar Sindu sareng Banjar Ambengan (kuwub satus), rauh mareresik, melap-lap, meambu-ambu rikala Patirtan Ida Bhatara.

Tetangunan wiadin (Pelinggih) sané kaempon antuk Banjar Sindu ring Pura Dalem minakadi :

- 1) Samian Pelinggih.

- 2) Samian Témbok.
- 3) Kori Agung, Candi Bentar.
- 4) Panggungan.
- 5) Perantenan ring Jaba Tengah.
- 6) Balé Agung.

Tetangunan wiadin (Pelinggih) sané kaempon antuk Banjar Ambengan ring Pura Dalem minakadi :

- 1) Sami Pelinggih ring Pura Taman Arum.
- 2) Candi Bentar.
- 3) Samian Témbok Panyengker.
- 4) ...

ma. Upon-upon ring palemahan Pura Dalem meserah ring Banjar Sindu.

Upon-upon ring Pura Désa utawi Puseh meserah ring Banjar sané ngempon.

Pawos 32

(1) Ring soang-soang Pura inucap ring ajeng kewéntenang Pamangku Lanang Istri.

(2) Ngadegang Pamangku Désa manut dudonan luihé :

ha. Nyanjan minakadi nunas pawuwus utawi pasuwécan Ida Bhatara sané malinggih ring Pura inucap.

na. Turunan Mangku mawiwit sakéng keturunan utawi Oka wiadin warih sakéng Mangku sané let.

ca. Kabilih antuk krama désa manut pararem.

ra. Yan pradé pinunas inucap ring ajeng tan prasida patut kawéntenan sésadian Krama Désa Pakraman Sayan.

(3) Sané tan patut keadegang Pamangku :

ha. Cedanggé luihé : peceng, perot, tukang, cungh, bongol lan selantur ipun. na.

Kegeringan luihé : sakit ile, buduh lan selantur ipun.

ca. Wong animpang laku.

ra. Wong sané tan kararemin antuk krama désa.

Pawos 33

- (1) Prebéa ngadegang mangku lanang lan istri kamedalang antuk krama désa sami, yan mangku inucap keadegang dados mangku khayangan Désa.
- (2) Yaning sané keadegang mangku punika mangku ring Panti, Dadia, Pura Subak prabéania kamedalang antuk penyiwi Pura inucap.

Pawos 34

Rikala sang keadegang pamangku Khayangan Désa Séda riwekas mangda kapitrayadnya olih kulawarganyané, krama désa nyanggra antuk patus marupa :

- (1) Beras 3 (tigang) pikul.
- (2) Kelapa 300 (tigangatus) bungkul.
- (3) Adeng 300 (tigangatus) bungkul.
- (4) Jinah bolong 600 (telungatak) keteng.
- (5) Kasa 15 (limolas) meter.

Pawos 35

Tetegenan pingkalih swadharmaning Pamangku minakadi ring sor :

- (1) Tetegenan Pamangku :
 - ha. Ngarianing aturan ring Pura nemonin odalan alit, ngasasih.
 - na. Ngaryanin aturan nemonin rerainang minakadi; Purnama-Tilem, Kajeng Kliwon, Rerainan Jagat.
 - ca. Nyadokan ring Prajuru yéning wénten Pretima utawi raja penganggé sané usak.
- (2) Swadharmaning Pamangku :
 - ha. Ngaturang upacara Piodalan ritatkala patirtan Ida Bhatara.
 - na. Ngaturang Panauran sinalih tunggil krama désa.
 - ca. Nyarengin ngerombo Pamangku Pura siosan ring Khayangan Désa rikala patirtan Ida Bhatara.
 - ra. Sang jagi mapanauran patut mesadok ring Prejuru Désa mangda daging panauran kasurat, (keilik itayang) bilih-bilih panauran inucap marupa harta berana mangda kasurat dados druwén Désa.

- ka. Sejawinan panauran, minakadi sesari-sesari kapuputan antuk pamangku kemaon.
- da. Pamangku muputang upacara nista muah madya, yan Upacara Utama kengin nuhur Sang Sulinggih, Pamangku maka panyanggra.
- ta. Ngénterang utawi ngastawayang sahanan upacara ritatkala patirtan utawi yadnya siosan ring Pura wantah banten **parareman** ngunggahang patut kapuputang antuk Sulinggih.
- sa. Ngastawayang utawi ngénterang sahanan ritatkala wénten krama pacang ngaturang punia sakadi panauran utawi nunas peneduhan ring Pura.
- wa. Ngalaksanayang sahanan pemuat suci ring Pura nedunang utawi ngelinggihang Pretima utawi Prelinggan Ida Bhatara.
- la. **Pamangku Khayangan Tiga yogya nyiratin Tirta ring sané siosan, sakéwanten ring krama sané singgihang patut sangkaning kalugra antuk sang katirtan.**
- ma. Pamangku mangda nyiratin krama désa sané wusan muspa sakéng unkur mangda becik utawi dabdab pamarginétan meseliweran.
- ga. Nunas tirtan wangsuh padan Ida Bhatara majalaran antuk toya sané suci, ning tan peleteh tan ngawetuang gering.

Pawos 36

Petias utawi olih-olihan Pamangku kadi ring sor :

- (1) Sarin canang.
- (2) Leluputan ayah.
- (3) Leluputan ngemedalang rerampé utawi reramon.
- (4) Kaping singgih antuk krama manut linggih tur sésanannya.
- (5) Polih pah-pahan pemupon sakéng bukti/palaban pura sané keamong manut dresta sané sampun mamargi.
- (6) Mangku Khayangan Tiga ngewarsa apisan polih wastra sakéng Désa Pakraman.
- (7) **Yan wénten silih tunggil Mangku Khayangan Tiga miwah Pamangku Kahyangan Desa sungkan nyantos enek metamba ring rumah sakit, kaicén dana punia sakéng Désa Pakraman manut kesidan utawi manut pararem.**

Pawos 37

- (1) Ritatkala ngénter Yadnya utawi patirtan ring pura pamangku ring Pura inucap patut :
 - ha. Pinaka pangénter, pangarep ring pura inucap.
 - na. Yogya polih pengerombo ring pamangku sané siosan.
 - ca. Yogya niwakin pituduh ring pamangku sanak/pamangku siosan marep ring krama siosan.
- (2) Yan pradé Mangku sané marep keni kapialang janten tan prasida ngamargiang upakara ring pura, patut upakarané kamargiang antuk pamangku pura sané siosan utawi nuwur Ida Sang Sulinggih.
- (3) Pradé Pamangku ngalap ngalap rabi duaning balu masengker paling akidik 42 (petang dasa dua) / abulan pitung rahina patut sang rabi kawintenin sakéng prabéa désa.
- (4) Yan pradé wénten Pamangku keni ujar ala, ulah ala, pamangku inucap patut kaprascita kasepuh olih krama désa sang maweh ujar ala muah ulah kakenén pamidanda manut parareman.
- (5) Yan pradé wénten Pamangku kabuktiang animpal laku nyasar ring sésanan pamangku, pamangku inucap tan kewenangan kasepuh tur tan kewenang katunasang pematut ring sang Sulinggih utawi sang patut mawosin.

Pawos 38

- (1) Rikala petoyan utawi patirtan ring pura, warga désa sané jaga pedek ngaturang bakti, patut nganggé busana manutin agama Hindu, manut drestané ring Bali minakadi nganggé destar, nyaput muah nganggé wastra sané kedas (pamargin sané lanang). Sané istri sampun menek dehe patut mapusung (tan wenang megambahan) tur nganggé kamen lan nyelémpot.
- (2) Tragia makta sékar sukla, asep muah genah tirta.

Pawos 39

(1) Tan kalugra ngeranjing ring pura :

ha. Sang kacuntakan sangkaning sebel raga muah sebel kelayuan luiré :

- 1) Sebel kandel (ngeraja sewala) selami sadurung mebersih.
- 2) Sebel madruwé oka selami akambuhan utawi (abulan pitung rahina) sané istri, sané lanang manut parareman.
- 3) Sebel pangantenan selami durung mabeakala utawi mesakapan.
- 4) Sebel sang madrebe kelayoan selami 12 (roras) rahina.

na. Makta sahanan berana sané sinanggeh ngeletehin manut dresta.

ca. Wewalungan, yan ten jaga kaanggé yadnya.

ra. Manusa sané tan patut manut tata susila.

(2) Ring sajeroning pura muah palemahannya tan wenang :

ha. Masumpah utawi anayub cor sejawanin pituduh prajuru désa.

na. Makobetan, masenengan, lanang istri makolem dados asiki lsp.

ca. Mungguh tedun pelinggih yan tan pituduh pamangku utawi prejuru.

ra. Ngemargiang tirta muah upacara sejawanin mangku pangemong kerombo antuk pamangku sané siosan.

ka. Maujar ala, ulah ala, wak parusnya, muah mamisuh, mejaljal, mayuda punapi malih nyantos metu rah kabaos ngeletehin.

da. Menehin wastra, pusungan, muah sané siosan.

ta. Mececepin anak alit.

Palet 2

Indik Resi Yadnya

Pawos 40

(1) Sang pacang Mapudgala utawi maduijati, sejawinin nunas panugran ring sang rumawos minakadi (Kantor Agama) patut taler mesadok ring Prajuru Désa.

- (2) Prajuru inucap patut taler sareng nuréksaning mangda sulur kalih pamarginé yuktiyukti manut kecaping agama.
- (3) Risampun kagentosin parab ring sang Nabé, Prajuru patut nyiarang ring Warga Désané segelis nyané.

Pawos 41

- (1) Sajawanin pamangku sang pacang mawinten maka buatang mamargi nyonteng, dalang, sakaluir jaga ngénterang yadnya patut masadok ring prajuru Banjar utawi Désa.
- (2) Prajuru patut nyaksiang niténin lan wenang ngalangin yan kacihnan nyasar ring kecaping Agama utawi drestané.
- (3) Prajuru patut taler nyiarang indik kawéntenanné sang mawinten ngantos nyiarang indik pungkusané anyar.

Pawos 42

- (1) Krama Désa utawi Banjar katuntun antuk prajuru sareng nyaksinin niténin mangda sahanan yadnya sané kawéntenang kaicén pamuput olih pandita utawi sang sujana minakadi (mangku, dalang sakaluiré), manut kawenangannya soang-soang manut dresta.
- (2) Prajuru patut nuntun saha ngemanggala krama désa mikukuhin kasucian linggih para wikuné.
- (3) Sang nganuwur patut ngaturang dana punia manut wibuh kancit karyané.

Palet 3
Indik Pitra Yadnya

Pawos 43

Pangupakara sang lampus wantah kadi ring sor :

- (1) Mendem utawi ngeseng makacihna pakingsan ring ibu pertiwi utawi ring Bhatara Brahma (makingsan digeni), selami nutupang prebéa.
- (2) Atiwa-tiwa utawi upakara pangabénan wénten kalih soroh :
 - ha. Sané sampun ketus untu lan salantur ipun kaprebéa manut drestané.
 - na. Mayusa tigang sasih ngantos sadurung kepus untu patut ngelungah.
- (3) Sajaba punika yan wawu medal ngantos sadurung tigang sasih tan katiwa-tiwa.
- (4) Sang lampus durung kepus udel, durung mayusa tigang sasih, ngantos sadurung kepus untu utawi (makatus) wenang pendem premangkin lan tan nyuarayang kulkul.

Pawos 44

Swadarma lan tetegenan pradé wénten sinalih tunggil krama désa sané lampus :

- (1) Sang kedukitan :
 - ha. Patut nyadokang ring Prajuru Banjar utawi Désa, tur nunas tetimbangan ring kawéntenannya.
 - na. Ngaturang ring Prajuru jaga mapendem utawi kaabén.
- (2) Swadarmaaning Banjar :
 - ha. Prajuru mitetesi pamargin sang kaduhkitan manut angka (1), ring ajeng.
 - na. Nyuarayang kulkul manut drestané soang-soang.
- (3) Panyanggran Banjar selanturipun :
 - ha. Soang-soang krama nedunin muah ngamedalang patus manut pararem Banjar soang-soang. Pamargin punika kamargiang rikala ngabén utawi mendem.
 - na. Krama Banjar lanang istri ngambil kakaryan manut dresta miwah ngerombo rikala pengutangan, saha soang-soang mabusana adat sanistan ipun maselémpot utawi

masenteng.

- ca. Pamargin sawa muah upakarané mangda dabdab, antar tan kengin masuara gora utawi (ngarap watang).
- ra. Pradé murug kadi kecapé ring ajeng, angka 3 ring ajeng, olih Prajuru Désa patut kakenanin pamidanda manut pararem.

Pawos 45

- (1) Yan pradé sawané jagi malelet utawi nyékah, selami durung polih padéwasan, patut kasuntik antuk pormalin utawi sané siosan sané mresidayang ngicalang utawi nénten ngawetuang ambu sané nénten becik.
- (2) Sané jagi makingsan riantukan jagi nyantos padéwasan dados kakingsanan sajawaning; sanding, pepedan lan ngajangin.
- (3) Pagebagan ring paumahan sang kadukitan manut parareman Banjar soang-soang.

Pawos 46

- (1) Pamendeman patut nganutin déwasa muah tan kalugra :
 - ha. Rikala purwani, purnama, tilem, lsp manut dresta.
 - na. Rikala Bhatara Khayangan ngadeg.
 - ca. Muah rahina siosan manut dresta.
- (2) Mendem manut genahé ring sétra :
 - ha. Wong raré sané durung ketus untu genahé ring seman raré (bebajangan) di tebénan.
 - na. Sané mayusa langkungan ring ketus antuk kantos lingsir genahnya ring ulon, ring sétra.
 - ca. Ida sang Sulinggih genah atiwa-tiwa manut dresta.
- (4) Mapendem tan nganutin déwasa sané kabawos makingsan tan kalugra yan makarya gegumuk gumanti nyantos padéwasan, upakara mamargi sapatutnyané.
- (5) Yanin wénten jadma siosan mapendem irika kakenanin pananjung batu manut pararem Banjar soang-soang pangemong sétra.

Pawos 47

- (1) Pradé lampus sangkanin salah pati, ulah pati, lan sakancanipun kengin kabakta budal tur kapretéka kadi patut risampun kamanggala, antuk upakara-upakara banten panebusan lan pangulapan.
- (2) Jadma lampus sangkaning kena sakit ila, gering agung lsp. risampun kaupakara sapatutnyané patut megeseng makingsan ring geni tur kaupakara sakadi patuté.
- (3) Yan sampun wénten panumaya ngabén dados kaupakara manut nista, madya, utama.

Pawos 48

- (1) Sawa deha teruna patut nganggé rurub putih kuning.
- (2) Yan sawa inucap ring ajeng durung mepandes dados kamargiang manut kecap :
 - ha. Lontar sastra Paroktah; daging ringkesan ipun :

“Iki lingin Sastra Paroktah, ngaran, muwah yan hana wong durung mepandes katekeng pejah, aywa amandesing wang pejah tan kawenang angeludi wangke ngaranya, yan amandesing sawa yan mangkana kramania, papa dahat : apan tan kawenang ikang wong mati wehing sapékaraning wong maurip, tunggal halania sang maweh lawan sang wineh, tinemah de Bhatara Yama Dipati”.
 - na. Seminar V kesatuan tafsir terhadap aspek-aspek Agama Hindu daging ipun :
 - 1) Sané dados sangging reraman sang mati, utawi sané nruwénang kapatutan sang lampus.
 - 2) Sané dados sangging ritatkala nyangihin matatakan antuk padi.
 - 3) Tangan sangging kagelangin antuk jinah bolong satakan medaging benang.
 - 4) Sané anggé nyangihin minakadi kirkir kaanggén anggapan pingkalih bungan tunjung.

Pawos 49

- (1) Pradé wénten sang istri lampus ngadut manik tan wenang kapendem utawi kageseng sadurung bobotné hembas mawastu urip utawi padem taler tan kalugra mepasah.
Sang sané séda patut kesadah utawi sang raré kamedalan (operasi).

Pawos 50

- (1) Pradé keanan wong lampus ring pakarangan tegalan, carik utawi genah siosan bilihbilih genah sinanggeh suci sang madrebé sawa patut marayascita genah inucap manut dresta mewaneng sadurung asasih pitung rahina.
- (2) Yan pradé wénten wong séda ring genah sané kabawos ring kecapé no.:1 ring ajeng kadi ring sor :
- ha. Yan tan wénten ngelingan sasampunné kapituduh antuk guru wisésa utawi (Pemerintah) mangda kapendem, upakara pamarayascita paletahan désané, kamargiang olih krama Désa Pakraman Sayan.
 - na. Yan wénten wong mawiwit sakéng Désa Pakraman Sayan, nanging wong inucap tan nganutin pararem désa (tan makrama Désa Pakraman), yan mendem sawa ring sétra Désa Sayan patut keni penanjung batu muah upakara sané siosan manut pararem.

Pawos 51

- (1) Mungwing kecuntakan utawi sebel kadi ring sor :
- ha. Sakéng bebanjaran kacuntakan selami tigang rahina sakéng mapendem utawi ngabén (malebar) buntas.
 - na. Sang madué layon kacuntakan 12 (roras) rahina.
 - ca. Sakéng suluh pakilitan pakulawangan, tunggal dadia utawi pamerajan kacuntakan 7 (pitung) rahina.
 - ra. Saking pangapit lan pemapar kacuntakan selami 7 (pitung) rahina.
 - ka. Yan anak alit sané dereng makupak (tan masuara kulkul, sang madué kapatutan kacuntakan 12 (roras) rahina, krama banjar tan keni kacuntakan.

- da. Sang nyambut karya Pitra Yadnya cuntakania ngawit saking ngawangun ngantos wus mékala meji.
- ta. Jadma sané karuron keni kacuntakan 42 abulan pitung rahina.
- (2) Yan wénten jadm lampus sawengkoning Désa Pakraman Sayan, tan kalugra nyuarayang kulkul, makingsan 7 (pitung) rahina sadéréng upakara piodalan ring khayangan tiga.
- (3) Tan kenén cuntaka :
1. Sang Sulinggih, pandita utawi pinandita.
 2. Pamangku Khayangan Tiga.
 3. Rikala mawangun yadnya sané kabawos galah dadi.

Pawos 52

- (1) Atiwa-tiwa wénten 4 (petang) soroh :
- ha. Nyawa rsi utawi nyuasta geni.
- na. Sawa pretéka.
- ca. Asti wédana.
- ra. Atma wédana.
- (2) Nyawa Rsi kalaksanayang pangawak duaning tan ngagah utawi sawané tan kakeniang.
- (3) Sawa pretéka kalaksanayang antuk mretéka sawa wawu bah.
- (4) Asti Wédana kalaksanayang antuk mretéka galih utawi asti sawa sané sampun polih kapendem majalaran antuk ngagah.
- (5) Atma wédana ngupakara sanghyang atma mangda acintya ring Ida Sang Hyang Widhi.

Pawos 53

- (1) Tan wenang mendem utawi nunjel sawa miwah awak-awakan sawa ring karang paumahan.

- (2) Yaning sang sulinggih utawi sedaka jaga kageseng ring palemahan Désa Pakraman puniki minakadi tegalan utawi carik sang anganggén patut ngupakara sadurung, rikala ngamargiang muah risampun wusan pagesengan.
- (3) Yan genah sané kaanggén ngeseng nénten druwén sang nganggé, pinih riin patut wénten lascaria sané madué kasaksinin antuk prajuru banjar utawi désa.

Pawos 54

Ngabén dedakdakan patut kalaksanayang :

- (1) Yan ring Désa Pakraman Sayan wénten ngarencanayang Piodalan Agung minakadinipun Ngusaba Désa, Ngusaba Nini, Melaspas Agung lsp.
- (2) Pamargin upakara pingkalih pamargin banjar sané mitulung sang kedukitan manut ring dresta utawinia malarapan antuk parareman banjar soang-soang.

Palet 4

Indik Manusa Yadnya

Pawos 55

- (1) Manusa yadnya inggih punika upacara-upacara dharmaning manusa ngawit sakéng patemoning kama bang sajeroning garba sang ibu ngantos selamining nyeneng.
- (2) Upacara ring ajeng madudonan sakadi ring sor :
 - ha. Magedong-gedongan duk ngerempini sang ibu utawi (bobotan manusa) mayusa 3 ngantos 4 sasih.
 - na. Raré wawu medal.
 - ca. Kepus wadel.
 - ra. Risampun 12 utawi (roras) rahina.
 - ka. Tutug akambuhan utawi (asasih pitung rahina).
 - da. Raré mayusa tigang sasih utawi (asambutan).
 - ta. Raré mayusa enem sasih utawi (aoton).

- sa. Raré mayusa plekutus sasih utawi (tigang woton).
 - wa. Mapetik rambut.
 - la. Tutug duwur utawi (ngeraja sewala).
 - ma. Mepandes utawi (mesangih).
 - ga. Mawiwaha utawi (mesakapan).
 - ba. Mawinten utawi (madwijati).
- (3) Upakara soang-soang ring ajeng nganutin nista, madya, lan utama nganutin kecap Agama Hindu miwah catur dresta, sima miwah désa mawacara.

Palet 5

Indik Butha Yadnya

Pawos 56

- (1) Butha yadnya inggih punika upakara-upakara pabyakalan ring pertiwi, khayangan, sarwa prani, saha upakara ring babutan.
- (2) Upakara-upakara pabyakalan ring sarwa prani luihé :
- ha. Tumpek pengarah utawi pengatag panemoning Saniscara Kliwon Wariga, upakara majeng ring pepayonan.
 - na. Tumpek andang utawi Uyé, nemoning Saniscara Kliwon Uyé, upakara majeng ring sarwa ingon-ingon utawi wewalungan.
 - ca. Upakara pékala-kalan manusa manut wiguna ketah kabaos pabéakala.
- (3) Upakara-upakara Pabyakalan ring pertiwi miwah khayangan lan ring bebutan kawastanin mecaru.
- (4) Pacaruan inucap ring ajeng nista, madya, utama manut wiguna kadi ring sor :
- ha. Éka sanak utawi (caru siap berumbun).
 - na. Panca sanak utawi (caru siap lima).
 - ca. Panca kelud utawi (caru siap lima, bebek belangkalung, asubang bungkem).
 - ka. Rsi gana.
 - da. Tawur kasanga.

ta. Pemalik sumpah.

sa. Tawur Agung.

wa. Masegehan ritatkala kajeng kliwon :

1) Ring natar sanggah utawi pamerajan katur ring Sang Kala Bucari.

2) Ring natar umah katur ring Sang Buta Bucari.

3) Ring natar lebuah katur ring Sang Durga Bucari.

(5) Siwosan ring punika kawéntenang upakara yadnya sésa utawi (mesaiban) rikala sampun wusan ngerateng sadéréng ngajengan utawi marayunan.

(6) Surudan caru minakadi layang-layang mangda kapendem ring genah soang-soang, tur leluwun caru inucap mangda katunjel mangda nénten ngeletehin palemahan.

Pawos 57

(1) Rikala nemu tilem sasih 6 (kenem) patut kawéntenang pacaruan ring sétra manut dresta banjar soang-soang.

(2) Upakara pacaruan inucap kempon utawi kalaksanayang olih pengempon sétra soangsoang.

Palet 6

Indik Panyepian

Pawos 58

Mungging panyepian patut kamargiang kadi ring sor :

(1) Majeng ring Ida Bhatara patut :

ha. Pangelong ping 13 (telulas) tileming kasanga Ida Bhatara melasti manut dresta.

na. Pangelong ping 14 (pat belas) Bhatara nyejer di Balé Agung.

ca. Ring Tileming kasanga nyoréang upakara pacaruan ring Pura Désa utawi (Balé Agung).

- (2) Pidaging upakara kakaryanin magiliran soang-soang banjar kuwub satus tur kaénter antuk tetabuhan utawi gong gegrondongan utawi (beleganjur).
- (3) Upakara tawur kasanga manut kadi ring sor :
- ha. Ring tileming kasanga kawastanin tawur kasanga utawi kaloktah kaucap ngerupuk, pacang magpag rahina nyepiné bénjang.
- na. Pacaruanné manut dresta :
- 1) Ring Pura Désa utawi (Balé Agung) Panca Sato utawi / Panca Kelud.
 - 2) Ring soang-soang banjar pacaruanné Panca Sanak.
 - 3) Ring soang-soang lebu manut arah-arah.
- (4) Ring tepengan ngerupuk nyoréang tan kengin liwatin tengah lemeng utawi tengah wengi.
- (5) Tata carané ngerupuk mangda pamarginé trepti, katureksain antuk prajuru, pradé murug keni danda manut pararem banjar soang-soang.

Pawos 59

- (1) Upakara rahina Nyepi nganutin catur brata sakadi ring sor puniki :
- ha. Amati geni, tan kengin maapi-api sejawinin :
- 1) Sang madruwé raré déréng tigang sasih, ring genah raré inucap.
 - 2) Sang matepetin ring genah sang sungkan.
 - 3) Sang nuwénang layon ring paumahan sang madruwé layon.
 - 4) Ritatkala wénten upakara piodalan ring khayangan pingkalih ring pameran, sakéwanten mangda tan masinaran doh kagenah sané siosan.
- na. Amati karya, tan wenang nyambut karya.
- ca. Amati lelungan, tan kengin malelungan utawi medal kamarginné.
- ra. Amati lelangunan, tan kengin masuara gora utawi nyuarayang matemahan ribut lsp.
- (2) Berata panyepian kadi kecapé ring ajeng katilik tur katuréksa ring pecalang muah hansip taler kasarengin antuk prajuru ring banjar soang-soang.
- (3) Pecalang mapanganggé busana adat, kampuh poléng, lan hansip nganggé busana dinas.

(4) Pradé tan manut kadi ring ajeng utawi murug brata panyepian patut katiwakin pamidanda manut pararem.

Pawos 60

(1) Riwus Nyepi kawastanin ngembak geni, tatkala irika wawu dados lepas ring merata panyepian, saha kedulurin ngaksama pangaksama soang-soang kulawarga, maka cihna ngawit déwasa isaka warsa.

PANCHAMAS SARGAH
SUKERTA TATA PAWONGAN

Palet 1

Indik Pawiwahan

Pawos 61

- (1) Pawiwahan inggih punika patemoning purusa lan pradana, malarapan panunggaling kayun suka cita kadulurin upasaksi sakala kalawan niskala.
- (2) Palaksanaan Pawiwahan wénten 3 (tigang) soroh luihé :
 - ha. Pepadikan.
 - na. Ngerorod.
 - ca. Nyeburin utawi nyentana.
- (3) Pidabdab Sang Mawiwaha patut :
 - ha. Sampun munggah daha kalawan teruna.
 - na. Sangkaning pada arsa suka cita (tan kapaksa).
 - ca. Manut kecaping agama utawi tan gamia gemana, lsp.

Pawos 62

Pamargin pawiwahan inucap ring pawos (72) mangda taler nganutin Undang-Undang panegarané inggih punika UU No. 1 warsa 1974, PP No. 9 warsa 1975, lan paswaran sané kamedalang olih Gubernur Kepala Daerah Tingkat I Bali, muah PP No. 10 warsa 1983.

Pawos 63

- (1) Parabian sané kapatutang sakadi ring sor :
 - ha. Pawidi widanan sanistané pabiyakala (madengen-dengenan).
 - na. Kasaksiang antuk prajuru-prajuru dinas muah adat.
 - ca. Kamungghang sajeroning pailikitan ngantos rawuhing sang angawerat (Camat) utawi Catatan Sipil.

(2) Pawiwahan tan kapatutang sakadi :

- ha. Natab upakara sangkaning kapaksa.
- na. Sinalih tunggil tan rawuh utawi tan wénten ring genahé natab.
- ca. Nénten wénten ilikita muah saksi-saksi.

Pawos 64

Tata caraning pawiwahan patut sakadi ring sor :

(1) Sapasira ugi pacang ngawarangang kulawarganya patut mapisedek ring prajuru Banjar, sané pacang maritastas manut tan manut, kadi drestaning pawarangan.

(2) Pamargin Pangrorodan :

- ha. Kulawargan Sang Lanang patut pinih riin mapilaku ring reraman wadoné, antuk duta sakirangé kalih diri tur tan dados liwat rahina.
- na. Risampun reraman wadon tur kulawarganya nerima panglukuan patut nepak kulkul, manut pararemsoang-soang banjar tur tan kengin nglangkungin arahina tur ngesyarang ring warga désa utawi banjar.
- ca. Yéning tan nerima pamilaku, kengin netes utawi neteg, patut kasarengin antuk prajuru Adat lan Dinas, manut drestaning netes.
- ra. Panetesan utawi neteg kamargiang ring paengkeban antené tur risampuné Sang Nganten nyinahang pada suka cita kasaksinin antuk Prajuru Banjar utawi Désa wawidangan paengkeban antené, reraman wadoné tan wenang ngambil pianaknya.
- ka. Rikala netes/neteg patut Sang netes matemu sadu arep ring sang sané katetes.

Pawos 65

(1) Piteges Pawiwahan patut Sang Lanang marabi adiri taler asapunika sang istri.

(2) Yéning Sang Lanang pacang marabi langkungan ring adiri patut pinih riin polih paigum tur kacumponin antuk rabiné dumunan, kacihnayang antuk lingga tangan ring sewala patra, indik inucap kasaksinin antuk Prajuru Adat lan Dinas.

Pawos 66

Pradé wénten salah krama, gamia gemana, drati krama (mamitra, mamitra ngalang) patut kasisipang tur katiwakin pamidanda manut parareman Banjar soang-soang saha nyarunin désa, agung alit caru, katetepang antuk Sang Sulinggih (Sang Pinandita).

Pawos 67

- (1) Pawiwahan sangkaning pada lila sakéng mabinayan wangsa, patut kadulurin antuk upacara Patiwangi mantuk wadoné, yan wadoné sakéng wangsa singgihan.
- (2) Yang lanangé sakéng wangsa singgihan tur wadoné sudra wangsa, patut wadoné kagentosin wasta antuk pungkusan rabi manut dresta.

Pawos 68

Pawiwahan sakéng mabinayan agama, sadurung upacara pawiwahan kamargiang patut kariinin antuk upacara widhi widana mantuké sang magama tiosan ring agama Hindu sané mateges upacara “Wisudi”.

Palet 2

Indik Nyapihan

Pawos 69

- (1) Pawiwahan sida wusan malarapan antuk : Palas marabian utawi silih tunggil padem.
- (2) ha. Wusan marabian sangkaning silih tunggil lampus utawi padem mapiteges balu.
na. Palas marabian sangkaning wicara pracihna tan tumus sukacitaning panunggaling idep alaki rabi mapiteges Nyapian.
- (3) Sang palas marabian manut ring angka (2). 2. Patut atur supéksa ring Sang Rumawos (Pengadilan Négeri) wastu tinas apadang pamutus kabaos Nyapian.
Ngalantur prajuru nyiarang kawéntenannya ring krama désa.

Pawos 70

- (1) Sulus palas marabi pradé sinalih tunggil : anyasar laku, cedangga, Wirosaning laku, matilar tan pasedek miwah setata wakparusnya tan prasida adung malih.
- (2) Yaning nyapian punika katumusang antuk lanangé, patut macihna :
 - ha. Istriné paradara (anyasar laku).
 - na. Istriné amandal sanggama (utawi maambul –ambulan ngantos 6 sasih).
 - ca. Istriné cedangga (tan prasida nyanggama / matemu laki rabi).
- (3) Yaning nyapian punika katumasang antuk istriné, patut macihna :
 - ha. Lanangé drati krama (gemes) wiadin wirosa.
 - na. Lanangé wanglu (cedangga).
 - ca. Tan nyanggama saha tan ngupajiwa jantos 6 sasih.
- (4) Prada manut Tri Pramana sang mawicara inucap ring ajeng angka (2).(3) :
 - ha. Parabian kengin kapalasang.
 - na. Tan kengin makta arta brana, pagunakayan.
 - ca. Katiwakin pamidanda 25 kg beras, saha upacara masapsap ring Khayangan Tiga, kasaksinin antuk prajuru Désa miwah Banjar.

Pawos 71

Pradé riwekas sang palas marabian kacihnayang adung malih patut :

- (1) Ngalaksanayang pawiwahan tur kawidhi widana malih, manut upacara pawiwahan.
- (2) Keni pamidanda nikel saking palasé, pamarginé inucap kawastanin Tulak Wali.

Pawos 72

- (1) Balu kabinayang dados :
 - ha. Balu luh wit sentana (Balu rajeg) miwah balu luh boya sentana.
 - na. Balu muani kapurusan muah balu muani nyeburin (boya sentana).
- (2) Swadharmaning balu inucap patut :
 - ha. Ngamanggehang pati brata, tan kengin ngamargiang paradara/dрати krama.

- na. Nguasayang waris pagunakayan, tan kengin ngadol, ngedeang, makidhang sajawaning polih kabébasan saking pianak utawi pakulawargannya (pradé pianakné kantun alit-alit).
- ca. Kengin ngidih sentana pradé sampun wénten pidabdab sadurung sinalih tunggil lampus saha kaembasayang antuk kaluarga sinanggeh kapurusan.
- ra. Balu muani nyeburin kawehin mawiwaha malih pradé sampun polih paigun saking ipianak daha/taruna utawi kulawarga kapurusan.

Pawos 73

(1) Balu tan pageh luihé :

- ha. Drati krama/Paradara.
- na. Matilar saking paumahan tanpa sadok, jantos selami 6 sasih.
- ca. Lempas ring swadarmaning balu, tan prasida ngehehin solah setata tungkas arep ring pituduh pakulawarga kapurusan.

(2) Yéning macihna kadi ring ajeng manut Tri Pramana, wenang balu luh boya sentana miwah balu muani nyeburin kengin :

- ha. Kaulihang antuk kulawarga kapurusan, tur tan kengin makta pagunakayan.
- na. Tan polih upon waris.

(3) Pradé balu inucap pageh, kaékan-ékanang antuk kulawarga kapurusan kengin polih pahan pagunakayan.

Palet 3

Indik Sentana

Pawos 74

(1) Mungguhing sentana wénten kalih soroh luihé :

- ha. Preti sentana.
- na. Sentana paperasan.

- (2) Preti sentana inggih punika sentana sané metu sakéng pawiwahan sané kaloktah kaucap Oka.
- (3) Pradé pawiwahan tan ngawétuang oka (tan madrebé preti sentana) kengin ngidih sentana antuk upasaksi sakala niskala saha kawastanin sentana paperasan.

Pawos 75

- (1) Meras sentana manut dudonan, patut maka cihna arta brana (Pemelin basan buat) saha kasaksinin sakala niskala.
- (2) Sapasira ugi pacang ngidih sentana (meras) patut mesadok ring prajuru Banjar (Kelihan Dinas/Adat) sanistannya asasih (sasur rahina).
- (3) Prajuru Banjar patut nyinahang indik pangrencanan punika ring warga Banjar.
- (4) Yéning wénten sinalih tunggil warga désa/banjar sané mapikarsa nénten manut ring pangrencanan sang jaga memeras, upacara pemerasané, durung dados kamargiang nyantos sampun pada gilik-saguluk, sinalih tunggil wenang ngatur supéksa ring sang Rumawos (Pengadilan Négeri) mangda kaicénin pamutus. Yéning sajeroning tigang sasih (105 rahina) sinalih tunggil nénten ngatur upeksa ring sang Rumawos (Pengadilan Négeri) meras sentana manut dudonan sinanggeh sampun sah, polih rawos gilik saguluk sakéng krama Banjar/Désa.

Pawos 76

- (1) Pamerasan sinanggeh sampun pastika risampun macihna :
 - ha. Widhi Widana.
 - na. Kasaksinin prajuru Adat miwah Dinas.
 - ca. Kasyarang ring paruman Banjar/Désa.
- (2) Kengin taler kakaryanang sewala patra (Akte) ring sang Rumawos (Camat) utawi catatan Sipil.
- (3) Sang patut kaperas anggén sentana sakadi ring sor :
 - ha. Jadma sané magama Hindu.
 - na. Pepernahan nedunang saking sang meras.
 - ca. Kulawarga sakéng purusa sané pinih nampek, yan tan wénten, dados sané dohan, yan taler tan wénten, dados saking pradana, yan taler tan wénten dados sékama-kama.

- (4) Kengin ngangkat sentana langkungan ring adiri, kadadosang, manawita lananglanang, istri-istri utawi lanang istri.

Pawos 77

- (1) Pradé wénten sinalih tunggil krama désa madruwé putra kembar lanang istri utawi buncing, tan kengin ngenahang ring pempatan utawi ring sétra.

Kulawargannya patut ngalaksanayang upacara yadnya macaru ring paumahannya.

- (2) Krama Banjar patut ngalaksanayang upacara Yadnya macaru ring Banjarnya. Krama Désa Pakraman patut ngalaksanayang upacara Yadnya macaru ring Pura Désa.

Ageng upacara Yadnya punika katetepang antuk Sang Pinandita (Sulinggih).

Palet 4

Indik Warisan

Pawos 78

- (1) Warisan inggih punika tetamian Arta Brana saha ayah-ayahan ngutpadi kasukertan sakala niskala saking kaluhurannya arep ring sentanannya.

- (2) Kang Sinanggeh warisan luihé :

ha. Druwé tengah.

na. Pamrajan, Panti, Paibon, lsp.

ca. Muah Arta Brana siosan, utawi utang druwén sang lampus.

Pawos 79

- (1) Sang patut ngawarisin utawi ahli waris, luihé :

ha. Preti sentana purusa.

- na. Sentana rajeg.
- ca. Sentana Paperasan.

(2) Pradé tan wénten sakadi ring ajeng, kang sinanggeah ahli waris :

- ha. Turun purusa pernah ngunggahang.
- na. Turun purusa pernah kesamping.

Pawos 80

(1) Swadarmaning ahli waris patut :

- ha. Nrima saha nguasa tetamian saking leluhurnya, minakadi ngrempon sanggah, pura lsp.
- na. Nyeledihinin ayah-ayahan pewaris.
- ca. Ngabénang pawaris.
- ra. Nawurin utang-utang pewaris.

Pawos 81

(1) Pangepahan warisan manut sakadi ring sor :

- ha. Risampun kalaksanayang Pitra Yadnya sang pawaris, muah katawur utang- utangnya
- na. Sang ngewaris polih pah-pahan pada, sangkaning pegunakayan sang pewaris. ca. Karang ayahan désa tan wenang kepah, kengin kapagilirang ring Sang sané polih ngayah marep.

(2) Sané kasenggoh karang ayahan désa wantah manut trimandala, luiyé :

- Utama Mandala (Sanggah), Madya Mandala (tegak umah), lan Nista Mandala (teba).

Pawos 82

(1) Ahli waris kengin tan polih pahan yéning :

- ha. Matilar sangkaning ngutang tategenan Banjar utawi Désa, masengker 3 (telu) bulan, upon-upon tanah/taném tuwuh ring karang ayahan punika kauponin antuk Banjar.

- na. Yéning wénten 10 (dasa) tiban ngutang tategenan Banjar, krama banjar wenang ngarerehang ayahan manut kadi pawos 97.
- ca. Tan malih nganutin Agama Hindu.
- ra. Alpaka guru rupaka
- ka. Sentana rajeg kesah mawiwaha muah Preti sentana nyeburin, soang-soang kabaos ninggal kedatuan.

Pawos 83

(1) Pradé boya ahli waris kengin mauponin kawéntenan manut dudonan :

- ha. Sentana luh selami dereng marabian.
- na. Balu luh wiadin balu muani (boya Preti Sentana/nyeburin) selami ngamargiang swadarmaning balu.
- ca. Mulih deha wiadin teruna.

(2) Pewaris maweweh rikala maurip pinaka :

- ha. Jiwa dana utawi tetatadan/bekel (makacihna paweweh tetep ring pianak sané kesah mawiwaha).
- na. Pangupa jiwa paweweh pawaris maka upon-upon kémawon.
- ca. Pedum pamong/raksa, pahan waris tatkala pawaris kantun maurip.

Pawos 84

(1) Pradé sajeroning pakulawargan wénten ahli waris langkungan ring adiri patut :

- ha. Kawéntenang paigum indik pedum waris inucap.
- na. Yéning tan prasida, wenang nunas tatimbang ring Prajuru Désa.
- ca. Yéning tan prasida gilik saguluk wenang nunas pamutus ring Pengadilan Négeri.

Pawos 85

(1) Pradé wénten karang kaputungan, sang prajuru wenang mawosin saking katuréksa sila-sila (Silsilah/sulur) pakulawargan sang kaputungan-kaputungan nibakang sakadi:

- ha. Ahli waris saking purusa.

- na. Yéning tan wénten kadi ring ajeng wenang kaambilang saking Pradana.
- ca. Yéning taler tan wénten dados sékama-kama nanging Wong magama Hindu saking Banjar inucap.
- ra. Yéning taler tan wénten dados sékama-kama nanging sané magama Hindu.

SASTAS SARGAH
SUKERTA TATA PALEMAHAN

Palet 1

Indik Karang, Carik lan Tegal

Pawos 86

- (1) Krama sané ngamong karang désa, carik utawi tegalan, patut ngawatesin karang, carik utawi tegalné inucap antuk pagehan utawi tembok utawi punden, utawi pal beton.
- (2) Yang wates inucap merupa pagehan tan dados langkungan ring 2 (kalih) méter tegehnyané.
- (3) Pradé wates punika ngelikadin, yanin pada arsa pangandikannia kengin batesé nganggon pinget kémaon.
- (4) Yanin wénten karang kabebeng mangda kautsahayang pamarginia.

Pawos 87

- (1) Karang Désa muwah tebe watesé magaleng kaluan, minakadi wates sisi kalér tur kengin kakaryanin antuk sang maderbé karang.
- (2) Wates sané marep kamargi mangda kanten asri, disisinyané patut katanduran (karang kitri) utawi bunga-bungan.

Pawos 88

- (1) Wates tegal utawi carik, patut magaleng katebén, pitegesnya sisi tebén patut kakaryanin antuk sang maderbé tegal utawi sawah (carik)
- (2) Wates inucap kengin antuk pagehan, punden wiadin prasihna minakadi pal saking beton.

Pawos 89

- (1) Sinalih tunggil krama désa utawi banjar tan kalugra :
- ha. Ngelalah tanah karang, palaba pura, margi, tegal miwah carik.
 - na. Ngelalah tegak tanah kayangan, sétra lan selanturipun.
 - ca. Ngembahang toya wit saking badan wewalungan, toyan kakus, utawi toya pesiraman, toya wit saking pewaregan lan kapakarangan utawi kapaumahan anak tiosan wiadin kamarginé.
 - ra. Ngentungan wangkén wewalungan, leluhu, kapakarangan, katukadé, kamarginé bilih-bilih kagenah sané kasuciang.
- (2) Pradéné wénten sakadi ring ajeng, sang angelaksana patut ngawaliang mangda nénten malih sakadi ring sané tan kalugra, ping kalih kakenin pamidanda manut pararém banjaré soang-soang.

Palet 2

Indik Pepayonan

Pawos 90

- (1) Ngawit nanem pepayonan patut :
- ha. Tan kadadosan nanem tuwuh ring pakarangan sikut satak.
 - na. Yanin ring tebe kadadosang mawates 1,5 meter saking watang wates.
- (2) Taru sané mentik ring wates kedroboyang antuk sang madrebé wates nanging tan ngantos ngalintangin wates.
- (3) Tan kalugra wit taru utawi pepayonan ngalintangan wates, bilih-bilih ngwasta mayanin penyandingnya.

Pawos 91

- (1) Pradé nénten pepayonan ngalintangin wates sakadi ring ajeng, kengin kawarah ring penyandingnya tur kasadokang ring prajuru mangda mituduhin sang nruwénan ngerebah

pepayonan inucap. Yaning sampun jantos ping tiga kasadokang ring prajuru taler tan kerebah kadadosang taru punika kerebah tur kapinake tiga : apah tiga, ngeranjing ka banjar, apah tiga sané druwéyang, apah tiga, sané ngadokan.

- (2) Yanin pepayon inucap ngantos ngerubuhin wawangunan utawi pepayonan muwah wewalungan anak tiosan, sang madrebé pepayon patut keni pamidanda pangaskara sanistané prayascita jangkep manut dudonan tur prebia manut sané kabayanin.
- (3) Yan wénten taru rebah nibénin wawangunan anak tiosan sangkanin kahanan jagat taru punika kadruwén olih sang katibén saliwat wates.

Palet 3

Indik Wawangunan

Pawos 92

- (1) Wawangunan patut :
 - ha. Nganggé asta bumi miwah gegalak astha kosala-kosali, sanistannyané patut manut ring patitis niskala.
 - na. Tan yogya nyayubin kapisaga.
- (2) Pradéné wénten wawangunan nyayuban kapisaga, sakadi ring ajeng, risampuné kasadokang ring prajuru, patut keni pamidanda manut pararem banjar soang-soang.
- (3) Pradé ngawangun tepisiring wates patut ngawéntenang paigun ring panyandingnyané, tur kasadokang ring prajuru maka saksinia.
- (4) Wawangunan ring tepisiring wates inucap patut nganggén abangan, mangdaning toyan capcapané tan kapisaga.

Palet 4
Indik Wewalungan

Pawos 93

- (1) Sahanan warga désa utawi Banjar sané miara sahanan wewalungan patut sayaga niténin, negul utawi ngelogor mangda tan ngarusak karang utawi tanduran jadma tiosan bilih-bilih jantos ngeranjing ngelethin kayangan muah genah sané kasuciang.
- (2) Prada wénten tan manut kadi ring ajeng, patut malungguhang ring sang madrebé wewalungan tur nyadokang ring prajuru banjar utawi Désa lan katiwakin pamidanda sakadi ring sor :
 - ha. Nyaruwin sanistannyané eka sata ring genah sané kaletihin yan wewalungan inucap ngeranjing kagenah sané kasuciang.
 - na. Ngesalinin wiwit sané karusak muah prabéya pepocolan, yan wewalungan ngarusak tetanduran anak siosan.
 - ca. Lian ring punika sang madruwé wewalungan patut katiwakin pamidanda manut pararém banjar soang-soang.

Pawos 94

- (1) Tan kawenang nganggon wewalungan ring :
 - ha. Palemahan Pura Kayangan Désa, panti-panti, paibon, pemrajan, sétra muah sané siosan sané sinanggeh genah sané suci.
 - na. Ring margi sapalemahan Désa.
 - ca. Carik muah tegalan anak tiosan, bilih-bilih carik utawi tegal inucap madaging tetanduran.
 - ra. Pakarangan anak tiosan.
- (2) Yan pradé wénten tan manut kadi angka (1) kecap ring ajeng, patut katiwakin pamidanda manut pararém banjar soang-soang.
- (3) Yan tan manut sakadi (1). 1 ring ajeng patut katiwakin pamidanda muah kadulurin antuk pacaruan manut pararém soang-soang Banjar.

Pawos 95

Tata Caraning Nabab Wewalungan

- (1) Pradé kacunduk wewalungan manjing maring genah sané sinanggéh suci utawi ngarusak tetanduran, tur tan wénten mariangken wenang ketaban antuk sang ketiban.
- (2) Sapa sira ugi sané polih nabab wewalungan patut :
 - ha. Mesadok ring prajuru Banjar utawi Désa, tur sang prajuru patut nuréksain wewalungan inucap.
 - na. Miara wewalungan inucap sapatutipun.
 - ca. Yan mamurug kadi kecapé ring 1 lan 2 ring ajeng sang anaban tan polih prabéya saking sang nruwéyang wewalungan, tur patut ngewaliang wiwit sepengargan wewalungan inucap.
- (3) Sang madruwé wewalungan patut :

Nawur prabéya ring sang polih nabab manut pararém Banjar soang-soang. Sajaba punika patut keni pamidanda sakadi kecapé ring pawos 35 ring ajeng.
- (4) Makarya bada tan dados nganggé wates anak tiosan.

Pawos 96

- (1) Risampun 3 (tigang) rahina wewalungan sané ketaban tan wénten sané mariangken, sang nabab patut nyadokang malih ring prajuru Banjar utawi Désa, mangda kasiarang ring warga Banjar utawi warga Désané.
- (2) Sawengkonin 15 rahina taler tan wénten sané mariangken wewalungan inucap, sané nabab, patut atur supéksa ring sang ngawerat minakadi Prebikel rauh ka Camat.
- (3) Risampuné 21 (selikur) rahina saking duké nabab, tur sampun atur supéksa kadi kecapé ring ajeng wewalungan inucap naler tan wénten sané ngangkening, pamargi salanturnyané manut pararém soang-soang Banjar.
- (4) Pradé wénten sang nabab tan nganutin pamargin kadi kecapé ring ajeng, sampun ngadol utawi matungan wewalungan inucap, raris wénten sané ngangkenin, sané nabab patut katiwakin

pamidanda ngawaliang wewalungan inucap utawi manut pangargannya tur pamidanda siosan manut pararém Banjar soang-soang.

SAPTAMAS SARGAH
WICARA LAN PAMIDANDA

Palet 1

Indik Wicara

- (1) Sané wenang mawosan makadi mutusin wicara ring Désa utawi Banjar, luihé :
 - ha. Kelihan Banjar Adat lan Dinas, minakadi sang mawicara tunggal babanjaran.
 - na. Bandésa Pakraman, pradé sang mawicara :
 - 1) Mabinan babanjaran.
 - 2) Mabinan désa.
 - 3) Nganinin druwén désa.
- (2) Pradé Sang mawicara tan wénten cupu ring tata caraning Kelihan mawosan, dados nunas kabandingan ring Bandésa Pakraman.
- (3) Taler tan wénten cupu ring tata caraning Bandésa, kengin nunas kabandingan ring sang rumawos utawi Pemerintah (Pengadilan).

Pawos 97

- (1) Sahanan wicara sané mawiwit kacorahan sakaluiré, miwah sinanggeh nungkasin daging Awig-awig pararem miwah pasuara patut premangkin kabaosin tan nyantos pasadokan.
- (2) Sajaba wicara sakadi ring ajeng patut nyantosan pasadok sang nunas baos.
- (3) Panepasé mangda pastika nyantenang iwang patut melaran tri pramana (saksi ilikita bukti), saha tan marén tampek ring catur dresta.

Palet 2

Indik Pamidanda

Pawos 98

- (1) Désa utawi Banjar wenang niwakin pamidanda ring warga Désa sané sisip.

- (2) Yanin sampun janten kasisipang (kapastika iwang) ring Kelihan Banjar, olih sang mawicara kabandingan ka Désa, tur antuk Bandésa Kapastika iwang, patut keni pamidanda nikel ring pamidanda sané katiwakin ring Kelihan Banjar.
- (3) Peniwak inucap kalaksanayang olih Bandésa utawi Kelihan Banjar nunggal-nunggal utawi sinarengan manut dudonan.
- (4) Agung alit pamidanda manut sor singgih kasisipan, tan marengutpadi dharma kaolas arsan pinih ajeng maka buatan kasudamalan Désa.
- (5) Bacakan pamidandané sakaluiré :
1. Danda arta muah panikel-panikelnya.
 2. Nunas pangampura (nyuka iwang).
 3. Upakara pangaskara.
 4. Kenoroyang makrama.
- (6) Jinah utawi arta brana pamidanda ngaranjing dados druwén Désa utawi Banjar.
- (7) Pamidanda sangkaning kabandingan kepah dados kalih, aparo ngaranjing ka Banjar lan aparo ngaranjing ka Désa.

Pawos 99

- (1) Rikala pawanéngan ngamedalang jinah papeson utawi urunan, dendan utawi dedosan, yéning celed ring wewanéngan sané sampun kewehin, mawaneng asangkepen nénten katawur keni pamidanda nikel.
- (2) Risampun nikel, mawanéng malih asangkepen, taler tan katawur patut kapakélingin antuk dharma olas asih, pradé taler tan satinut arta brananyané malarapan antuk cacidran ageng alit utang, kacirénin pacang kerampag. Risampun wénten tigang rahina sakéng kacirénin taler tan nawer patut kerampag.
- (3) Risampun polih wewanéngan malih tigang rahina sakéng kerampag, arta brana sané karampag tan ketebas, patut kalelangan. Yanin pangargan arta brana inucap langkungan sakéng utangnyané, kalebihannyané patut kawaliang ring sang karampag.

ASTAMAS SARGAH
NGUWAH NGUWUHIN AWIG-AWIG

Pawos 100

- (1) Nguwah-nguwuhin awig-awig puniki kalaksanayang antuk paruman Désa.
- (2) Paruman inucap mangda kadasarin antuk pakarsan krama désa.
- (3) Pamutus bawos mangda kadasarin antuk gilik saguluk.
- (4) Yan tan gilik saguluk patut kawéntenang cacah suara krama.
- (5) Awig-awig puniki wawu dados kewehin, karobah utawi kakirangin yanin 2/3 (dua pah telu) sakéng kulawarga masuara setuju.
- (6) Nguwahin awig-awig puniki kawéntenang ring paparuman Agung.

NAVAMAS SARGAH

SAMAPTA

Pawos 101

- (1) Awig-awig puniki mawasta awig-awig Désa Pakraman Sayan.
- (2) Awig-awig puniki kamargiang ngawit kararemin.

Pawos 102

- (1) Sakaluiré sané wénten sadurungnya patut kaanutang ring sadaging awig-awig puniki.
- (2) Sakaluring sané durung kabaos utawi kasurat sajeroning awig-awig puniki patut kalaksanayang manut tata cara sampun ketah mamargi kadulurin antuk pararem– pararem.

Pawos 103

- (1) Awig-awig puniki kararemin duk rahina Redita Wuku Ukir Sasih Kasanga Çaka warsa 1909 tanggal masehi 15 Maret 1987 (siu sangaatus ulung dasa pitu) ring Balé Agung (Pura Désa).
- (2) Kapasupati duk rahina Wrahaspati Umanis, wuku Dungulan sasih Kenem, Çaka warsa 1909 tanggal masehi 10 Desember 1987 (siu sangaatus ulung dasa pitu) ring Balé Agung (Pura Désa).
- (3) Tur kalingga tanganin antuk Bandésa, kelihan-kelihan Banjar sawewengkonin Désa Pakraman Sayan muah Prebekel Désa Kedewatan lan Camat Ubud maka saksi-saksi, tur kapastika olih Bupati Kepala Daerah Tingkat II Gianyar.
- (4) Luir sang ngalingga tanganin.

ha. Kaprathama Prajuru Désa Pakraman Sayan :

1. Bandésa Desa Pakraman 2. Penyarikan 3. Kelihan Banjar Pakraman

(.....) (.....) (.....)

na. Kaping Kalih Prajuru Dinas pinaka saksi

1. Kelihan Banjar Dinas 2. Perbekel Désa Sayan :

(.....) (.....)

3. Camat Ubud

(.....)

ca. Kaping Tiga

Murdha Pamikukuh Bupati Gianyar

(.....)

Telah Dicatatkan di Dinas Kebudayaan Kabupaten Gianyar Pada

tanggal :

Nomor :

Kepala Dinas Kebudayaan Kabupaten Gianyar

(.....)